

ТВОРЧЕСТВАНЬ КИЗЭ УШОДОВСЬ 20-це ИЕТНЕСТЭ

(Я.П.Григошинэнь 125 иетненень)

А.С.Пушкин лемсэ Национальной библиотеке краеведения, национальной ды финнэнь-угрань литературань отделэсь ютавтсь «Сура чирень морыця» леметь ало вастовома. Сон алтавсь Я.П.Григошинэнь чачома чистэнзэ саезь 125 иетненень.

Яков Пахомович Григошин чачсь 1888 иень ноябрынь 3 чистэ Пенза енксонь Шемышеень райононь Армиева эрзянь велесэ. Эйкашпингстэ кадовсь тетявтомом. Школос тонавтнемстэ пек вечксь ловномо рузонь поэтнэнь стихест. Варчнесь сермадомом сонськак. Васень стихэнзэ сермадсь рузокс. Се шкане тиринь кельсэ аволь сермадомом, мик кортамодояк эзь мере.

Яков Пахомович прядсь Казанень учителень семинария, тонавтнесь Саратовань университетсэ ды МНИИЯ-ЛИЭ-нь аспирантурасо. Вадодсь тонавтыцякс, «Якстере теште» газетасо литсотрудникекс.

Творчествань кинзэ ушодызе 20-це иетнестэ. Сон сермадсь стихть ды евтнемат. Якась эрзянь велева, панжтнесь тиринь кельсэ тонавтомань школат, совавтсь од койть. Сермас беряньстэ содыцятнень туртов нолдась «Васень пулт» ды «Од вий» тонавтнемань книгат. 1934 иестэ саезь – СССР-нь Писателень Союзонь член. Яков Пахомович сермадсь весе жанратнесп: прозасо, поэзиясо, драматургиясо, публицистикасо. Писателесь нолдась стихень ды евтнемань истят пусмот: «Од велень гайге-мат», «Толнэ», «Поздоровт теть, Мордовия!», «Колхозонь паксява», «Вирязонь нуцьказо» (эйкакштненень алтазь евтнемань пусмо) ды лия книгат. Я.Григошин истя жо сермадсь «Кузьма Алексеев» исторической операнть туртов либретто.

Рузонь кельс произведенийэнзо ютавтынзе И.Пиняев. 1980 иестэ лиссь «Октябрьские зори» сборникесь. Эсь шкастонзо те поэтэнь лемдэсть «эрзянь Кольцовокс». Сон алкуккак вечкилизе рузонь те поэтэнь, ламо тонавтнесь пельдензэ.

Яков Пахомович кеме сюлот кирдсь эрзянь васенце ученоенть М.Е.Евсевьевень марто. Сон тонавтызе Григо-



шинэнь фольклоронь вечкеме. Поэтэсь сеedyстэ якась велева, пурнась ламо евкст, морот, лайшемат. Весе сын лиснесь «Якстере теште» газетасо.

1931 иестэ Я.Григошин сась Саранскоев. Тесэ кувать шкань перть ульнесь народной комиссариатонь Советэнь искусствань коряс управлениянь прывтонь полавтыцякс. Ламо вий путсь Писателень Союзонть теemasо.

Течинь вастовомасонть Я.П.Григошиндэ кортасть литературоведэсь, критикесь, профессорось В.И.Демин, филологиянь наукань кандидатось, М.Е.Евсевьев лемсэ МГПИ-нь доцентэсь М.Н.Салаева, «Сятко» журналонь редакторонь полавтыцясь Л.Рябова.

– Григошин ламо сермадсь эрзякс ды эрзянь раськеденть. Сась шка – лемдизь националистэкс. Советэнь шка не те валонтэ ульнесь лия смустезэ. Сон шнась од эрзямонть, революциянь вастызе кецязь. Мон домкасто ваньнын 1930-40 иетнень журналтнэнь ды газетатнень. Зярья иеде икеле Эрмиева тиринь велесэнзэ ютавтось сонэнзэ алтазь покшчи. Пек апаро ульнесь, мекс сон мольсь рузонь кельсэ... – кортасть В.И.Демин.

– Яков Пахомовичень произведенийэнзо ванновить средней класстнэсэ. Келезэ чарьковедикс ды шожда. Маштсь еавтомо мелензэ эрзянь мазый кельсэ. Парсте содась эйкаштнень психологияст, ежост ды мелест. «Вирязонь нуцьказо» евтнеманть питнепезэ арась. Сон пек вечкеви эйкаштненень, – кортасть М.Н.Салаева.

Студенттнэ ды Николай Карпов морыцясь паро мельсэ ловнызь Григошинэнь стихэнзэ. Библиотекась аноктасть пек паро выставка. Тесэ невтевсть сермадыцянь произведенийэнзо, коллективной сборниктне, косо лиссть писателень стихэнзэ. Истя жо умонь шкань «Сятко» журнал, косо лиссть сермадовксонзо.

Яков Пахомович эзь кенере топавамс пек ламо бажамонзо. 1938 иестэ сонзэ лангс кучть кенгелема. Писателень сеске пекстызь. 1939 иень апрелень 24-це чистэнь маштозель. Комсте ламо иеть сонзэ лемезэ нардазель литературастонтэ. Ды ансяк 1959 иестэ Я.П.Григошин ловозель аволь чумокс. Зяро сестэ ломанть стяко чавсть, зяро валдо лемть емавть, – валт арась...

Т.МАТОРКИНА